

Perekeskuksen koortinaattori sanoo itensä irti
”Mulla ei ole pätevyyttä hoitaa teini-ikäisiä”

MATARINKI

– Mulla ei ole pätevyyttä hoitaa teini-ikäisiä. Siksi mie olen tahtonu virkavaphautta. Ko lasten- ja koulutusjohtaja Lena Hannu, minun päälikkö, ei myöntäny mulle virkavaphautta niin mie olen sanonu itteni irti.

Näin sanoo Sofi Wiippa Lahti, esikoulunopettaja ja Mataringin perekeskuksen koortinaattori.

Mataringin perekeskus alotti toimensa kevväilä 2014 KD-politiikon, Helena Haapaniemen, alotheesta.

– Aatos oli, ette perekeskus oon auki kaiken ikäsille. Mie tiän, ette se oon toiminu hyvin pieniimille ja niitten vanhemmille. Nyt mulla ei ole niin tarkkaa tietoa, mutta mie olen käsittäny, ette muutoksia oon tulossa. Mie ossaan vain sanoa, ette muutoksen häätyy tapahtua varovin käsin, Minun toivomus oon, ette tästä tullee hyvä jatkossaki, sanoo Helena Haapaniemi.

Politiikkojen rolli

Ko se saapi tietää, ette johtoroikassa istuu kaks politiikkaa – Åsa Alentalo (KD) lasten- ja koulutuslautakunnan jäsen ja varapuhheenjohtaja – se samoten ko muutki, joitten kans Haaparannanlehti oon puhunu, mennee hunteeraavaksi.

– Häätyvätkös politiikot toelaki mennä niin suohraan johthaan töitä. Se vaikuttaa kummalta, se sanoo.

Häätyy senki sanoa, ette lasten- ja koulutuslautakunta oon perekeskuksen päämies.

Politiikkojen rollista Lena Hannu sanoo, ette net oon siksi myötä ko perekeskustaa hoiethaan projektinna ja ette tässä oon kysymys siittä, ette net vain puuttuva sen pääsuuntauksheen.

Näin kunnanraati Tomas Mörtberg huomauttaa koko hommasta:

– Perekeskuksen aatos oli ottaa vastun kaikenikäisistä, äskensyntyneistä teini-ikäshiin. Tänäpäni perekeskus toimii vain avoimenna esikouluna 15 tiimaa viikossa.

Oon kuttunu Mörtbergin

Ko Sofi Wiippa Lahti saapi tietää mitä Mörtberg oon sanonu niin se reakeeraa sanomalla, ette perekeskus oon auki 20 tiimaa viikossa ja ette ylijäämää aikaa käytethään toimen suunnittelhuun ja hallinolisheen puohhaan ja markkinointhiin. Paikkojen korjaaminen ja materiaalin hoito kuuluu kans hänen työhön.

– Mie olen kuttunu sen tänne, tulla käyhään meilä perekeskuksessa. Se oon aina helpompi jos omin silmin näkkee ja sillä mallin saattaa saa'a käsityksen, Sofi Wiippa Lahti meinaa.

”Suojela”

Maakäräjät oon kans myötä projektissa. Näin sanoo terhveyskeskuksen päälikkö Elisabeth Eero:

– Perekeskus oon toelaki jotaki omaperästä toimintaa, jota meän pittää suojela. Sofi Wiippa Lahti oon tehny mahottoman hyvää työtä. Monet kunnat oon katheelisia meile perekeskuksesta. Oon kysymys etukätheen ehkäseväästä työstä ja aijoissa huomattavista ongelmista. Sen etuja näkkee piain vasta pitkän aijan päästä.

– Vanhemmila oon tarvetta tulla porisheen. Jos häätyy niin Sofi lähättää net etheen päin, mutta tästä alethaan. Olis villin surkeata jos huononis.

Sofi viittaa siihen, ette oon jo olemassa toimiva työ teini-ikäsilte vapaan aijan viettämisen talossa.

– Miksis ei oteta vaaria persunaalin ossaamisesta ja kehitetä teemailtoja Fripessä.

Jatkuvaa tointa

– Tämä oon projekti ja Sofi Wiippa Lahti oon palkattu joulukuun viimishen päihvään, mutta toivomus oon, ette toimi jatkaa. Vuele 2016 oon päätetty, ette perekeskus häätyy kans pittää yhtheyksiä semmoshiin vanhemphiin, joila oon vähän vanheempia lapsia.

– Meän toivomus oon, ette Sofi olis jääny ko se oon saanu vallan hyvän alun. Met freistaama ratkasta sen niin, ette toimi jatkuu ja toivoma, ette se tapahtuu yhtä hyvälä mallila.

Mie toivon kans, ette vanhemmat ja lapset jatkossaki tuleva keskuksheen.

Bild: Sofi Wiippa Lahti2-MB.jpg 173

Marianne Berglund, namn

FI Sofi Wiippa Lahti jääpi Mataringin perekeskuksen koortinaattoriksi huhtikuun lophuun. Epäselvyyksiä suuntauksen jatkosta annethaan syyksi ette se heittää.

Bild: Familjecentralen2-MB.JPG 82

Marianne Berglund, namn

FI

Perekeskuksen toimi oon ollu hyvä ja elävää. Siittä kaikin oon sammaa mieltä.

Meänkielennös: Bengt Pohjanen

Ekale: Perekeskus uutheen suuntauksheen